

Splicacion di Padre Baños a cay den bo tera

DOCTOR GREGORIO HERNANDEZ TA WORDE

MAL USA PA ESPIRITISMO

ORANJESTAD (AAN): E splicacion di Pader Baños encunto Doctor Gregorio Hernandez a cay den bon tera. Reaccionnan cu DIARIO a ricibi ta muestra cu na America Latino Doctor Gregorio Hernandez ta worde hopi utiliza pa practicanan di espiritismo. Hopi biaha e practicanan aki ta worde asina bon camufla, cu creyentenan ta cay den nan. A worde poni na atencion di DIARIO tambe cu ultimo añanan, a base di mal practica descubri, fielnan mes a lanta contra loke tabata socede.

For di reaccionnan ricibi DIARIO por a comprende cu tin basta hende contento cu ta den tempo di Cuaresma e topico aki a keda presenta. E ta digno di a worde trata den Cuaresma pa asina fielnan, cu

den Cuaresma ta busca mas acercamento cerca Dios, por mira e loke Doctor Gregorio Hernandez ta para pe.

E ehemplo di Doctor Gregorio Hernandez ta uno cu sigur mester worde sigui dor di Cristiannan, manera bida di otro Cristiannan cu a trata di pone un banda tur trampa di enemigo y sigui nan caminda pa busca Dios. E Cristiannan ehemplar aki ta duna creyentenan e sosten ora for di maldad di enemigo, nan mester saca ventaha pa derota enemigo pa mas honor y gloria di Dios.

Gregorio Hernandez tabata un Venezolano, cu tabata kier a bira pader y sirbi Dios na un forma completo. E tabata kier a dedica su bida na Dios y a pensa cu e unico forma cu e por a sirbi Dios tabata atrabez di Sacerdocio. Sinembargo, durante su estudionan el a haya e inspiracion cu e no tabata yama pa sirbi

Dios como sacerdote, pero como medico. Pa Gregorio Hernandez tabata dificil di acepta cu e lo no bira sacerdote, loke tabata su soño. Pero den un entrega total, el a baha cabez y a bisa Dios: "No mi voluntad pero di Bo sea cumpli".

Gregorio Hernandez a bira un dokter, cu atrabez di su trabao tabata muestra hendenan ariba Dios. Yudando tanto pover den necesidad di atencion medico y hunto cu su labornan medico, e tabata hiba e mensahe di Dios pa hende te ora un accidente di trafico a pone un fin na su bida na mundo.

E ta worde considera como ehemplo pa fielnan pa tur hende realiza cu ta for di e lugar cu Dios a pone hende den bida, nan mester sirbi Dios y haci segun Voluntad di Dios.

Sinembargo, practicanan oscuro a cumenza mani-

festa nan mes y penetra den e devocion di Doctor Gregorio Hernandez. Devocion ta contene: sigui e ehemplo di e persona y pidiE reza pa hende dilanti Dios. "Awe mes lo bo ta den Mi Reino" ta loke Hesus a bisa e ladron arepenti na Cruz y pesey fielnan tin e confianza cu esnan cu biba segun Voluntad di Dios, lo alcanza Su Reino y ta den Gloria di Dios, caminda nan por intercede pa esnan cu ainda ta na mundo.

E devocion di Doctor Gregorio Hernandez a worde mal usa bao diferente capa. Entre otro tabata tin persona cu tabata presenta nan mes como hende di oracion. Uno di e casonan aki tabata conoci na Aruba, caminda den gruponan chikito tabata tin sesionnan di oracion, cu

tabata despista hende.

Un dia uno di e practicanan aki a keda descubri ora un persona cu no tabata creyente, a subi caminda di fe y a bin realiza cu e persona cu tabata presenta su mes como sirbidora di Dios tabata utiliza tacticanan cu no ta cuadra. E persona, cu a descubri esaki, a actua den circulo cera y a percura pa e pasonan necesario worde tuma pa evita continuacion di e practicanan aki. Asina e Gloria di Dios a vence atrobe ora un pecador mester a descubri un practica contra Dios y kibra e practica aki.

E reaccionnan ariba e splicacion di Pader Baños encunto devocion di Gregorio Hernandez a cay den hopi bon tera segun personanan cu a reacciona a splica.